

بِسْمِ اللَّهِ الرَّحْمَنِ الرَّحِيمِ

تراقي كجيواعن TERAPI KEJIWAAN

TAJUK:

Covid-19 : Qada' & Qadar Ketentuan Allah

مَنْتَرِنَ جَوَالِ كَامَر

KEMENTERIAN HAL EHWAL UGAMA
NEGARA BRUNEI DARUSSALAM





“... Namun dalam keadaan apa pun yang Allah Ta’ala takdirkan seterusnya kita akan tetap teguh beriman dan kukuh bertaqwa. Sebab kita yakin sesungguhnya Allah Ta’ala telah mensyaratkan kepada penduduk sesebuah negeri bahawa mereka hendaklah teguh beriman dan kukuh bertaqwa supaya mereka dan negert mereka mendapat limpah rahmat Allah berupa al-barakaat daripada berbagai sumber. Rahmat yang dijanjikan Allah itu termasuklah khasnya dalam bentuk kemakmuran serta keamanan, kebahagiaan serta kesejahteraan sebagaimana mafhum firman-Nya ayat 96 Surah al-A’raaf: (لَوْ أَنَّ أَهْلَ الْقُرَىٰ آمَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ السَّمَاءِ وَالْأَرْضِ). Mafhumnya: “Dan kalaulah penduduk sesebuah negeri itu beriman dan bertaqwa tentulah Kami akan melimpahkan kepada mereka berkat dari langit dan bumi...””

(Kata-kata aluan Yang Berhormat Pehin Udana Khatib Dato Paduka Seri Setia Ustaz Haji Awang Badaruddin bin Pengarah Dato Paduka Haji Awang Othman, Menteri Hal Ehwal Ugama sempena Majlis Sambutan Awal Tahun 1440 Hijrah, Peringkat Negara pada Hari Isnin Malam Selasa, 1 Muharram 1440h bersamaan 10 September 2018M)

Covid-19 : Qada' & Qadar Ketentuan Allah

Beriman Dengan Qada' & Qadar

Menurut Ahli Sunnah wal Jama'ah, setiap orang Islam adalah dituntut untuk beriman dengan Qada' & Qadar yang merupakan salah satu dari rukun iman. Ini antaranya merangkumi perkara-perkara berikut:

- Mempercayai dan meyakini apa yang telah ditetapkan oleh Allah Ta'ala kepada makhluk ciptaanNya, sejak azali lagi pasti akan berlaku dan tiada sesiapa yang mampu menolaknya.
- Bertakunya sesuatu itu adalah bertepatan dengan 'ilmu Allah dan kehendakNya.
- Selaku hamba, kita menyerah diri pada kekuasaanNya atas apa saja yang berlaku dan beriman sepenuhnya serta meyakiniNya dengan sebenar-benarnya.

Ayat Al-Quran

Allah Subhanahu wa Taala berfirman di dalam Surah At-Taubah ayat 51:

قُلْ لَنْ يُصِيبَنَا إِلَّا مَا كَتَبَ اللَّهُ لَنَا هُوَ مَوْلَانَا وَعَلَى اللَّهِ فَلْيَتَوَكَّلِ الْمُؤْمِنُونَ

Tafsirnya: Katakanlah (wahai Nabi Muhammad kepada orang-orang munafiq itu): "Sesuatu pun sekali-kali tidak akan menimpa kami melainkan apa yang Allah telah tetapkan bagi kami. Dialah Pelindung kami. Dan (dengan kepercayaan itu) maka kepada Allah sahajalah hendaknya orang-orang beriman bertawakal."

Hadith Rasulullah ﷺ

Dari Umar ibn Al-Khatthab, pada suatu hari Rasulullah ﷺ didatangi oleh Malaikat Jibril. Malaikat Jibril bertanya, "Beritahukanlah kepadaku apa itu iman." Rasulullah bersabda yang bermaksud:

"Iman itu artinya engkau beriman kepada Allah, para malaikat-malaikat Nya, kitab-kitab-Nya, Rasul-rasul-Nya, hari akhir, dan kamu beriman kepada takdir yang baik maupun yang buruk." (Hadith Riwayat Muslim).

Hukum Beriman dengan Qada' & Qadar

Adalah wajib keatas setiap orang Islam beriman dengan Qada' dan Qadar. Malah tidak akan sempurna iman seseorang tanpa mengimaninya. Menurut ulama, beriman dengan Qada' dan Qadar mencakupi empat tahap berikut:

- Pertama: Meyakini bahawa Allah Ta'ala Maha Mengetahui setiap sesuatu sebelum ianya terjadi.
- Kedua: Meyakini bahawa semuanya yang berlaku telah tertulis di Lauh Mahfuzh.
- Ketiga: Meyakini bahawa terjadinya sesuatu merupakan atas kehendak Allah Subhanahu wa Ta'ala jua.
- Keempat: Menyakini bahawa semuanya adalah makhluk ciptaan Allah Ta'ala yang tiada Maha Pencipta selainNya.

Perspektif Beriman Kepada Qada & Qadar

Dalam kehidupan seharian pula, adalah perlu untuk mengambil berat untuk meneguhkan keimanan kepada Allah, redha atas Qada' dan Qadar yang ditentukan, bersyukur atas segala nikmatNya dan bersabar atas ujiannya, seiring dengan firman Allah:

وَلَوْ أَنَّهُمْ رَضُوا مَا آتَاهُمُ اللَّهُ وَرَسُولُهُ وَقَالُوا حَسْبُنَا اللَّهُ سَيُؤْتِينَا اللَّهُ مِنْ فَضْلِهِ وَرَسُولُهُ إِنَّا إِلَى اللَّهِ رَاغِبُونَ

Tafsirnya: Dan kalau mereka benar-benar redha dengan apa dikurniakan oleh Allah dan RasulNya kepada mereka dan berkata: "Cukuplah Allah bagi kami, Allah akan mengurniakan kepada kami daripada limpah kurnialNya dan (demikian juga) RasulNya. Sesungguhnya kami ialah orang-orang yang berharap kepada Allah." (Tentulah yang demikian itu lebih baik mereka). (At-Taubah 59)

Hikmah Beriman Kepada Qada & Qadar

Disebalik keimanan kita kepada Qada' dan Qadar itu, ada banyak hikmah yang tersembunyi yang boleh kita renungkan iaitu:

- Jiwa kita menjadi lebih tenang.
- Istiqamah dalam landasan yang betul sama ada di kala senang mahupun susah.
- Memupuk akhlak terpuji dan sifat-sifat positif di sanubari orang beriman.
- Memahami syariat Islam dengan kefahaman yang betul.
- Memenuhkan hati orang beriman dengan jiwa yang suci, yang meyakini keagungan Allah.
- Merasa cukup, tenang dan hanya berharap kepada rahmat Allah.
- Redha dengan ketentuan Allah.
- Membuatkan kehidupan harian individu mukmin sentiasa ingat akan kebesaran Allah.

Allah Mentakdirkan Setiap Penyakit Ada Ubatnya

Setiap penyakit secara umumnya telah ditakdirkan pasti ada ubatnya, dalam apa jua bentukpun, sama ada ia bersifat mencegah atau mengubati. Ini termasuklah wabak Covid-19 dengan kepelbagaian variannya itu pasti ada ubatnya sama ada yang sudah ditemukan ataupun belum. Ini dapat direnungi melalui hadith dari Usamah bin Suraiq, bahawasanya Nabi ﷺ bersabda, yang bermaksud:

"Aku pernah berada di samping Rasulullah ﷺ, lalu datanglah serombongan Arab Badawi. Mereka bertanya, 'Wahai Rasulullah, bolehkah kami berubat?' Jawab Baginda, 'Ya, wahai para hamba Allah, berubatlah, sebab Allah tidaklah meletakkan sesuatu penyakit melainkan meletakkan pula ubatnya, kecuali satu penyakit.' Mereka bertanya, 'Penyakit apa itu?' Beliau menjawab, 'Penyakit tua.' " (Hadith Riwayat Ahmad).

Sebab Musabab Tidak Menafikan Qada' & Qadar

Dari Abu Hurairah meriwayatkan bahawa Rasulullah ﷺ bersabda yang bermaksud: "Yang sakit itu janganlah mendatangi yang sihat." (Hadis riwayat Bukhari dan Muslim).

Di antara ajaran Rasulullah ﷺ apabila berhadapan dengan masalah penyakit berjangkit adalah melakukan pencegahan. Maka oleh itu, tanpa menafikan Qada' dan Qadarnya Allah, adalah menjadi tanggungjawab agama bagi setiap individu dan masyarakat untuk mengambil langkah-langkah pencegahan dan mengelakkan diri dari kemudaratan dan penyakit. Ini termasuklah mematuhi saranan semasa antaranya mengelakkan tempat-tempat himpunan awam termasuk masjid dan pasar-pasar, agar kita dan orang-orang lain dapat mengelak daripada dijangkiti ataupun menjangkiti.

Covid-19 : Qada' & Qadar Ketentuan Allah

Sebagai hamba Allah, kita tidak dapat lari dari apa jua ketentuan Allah Taala sama ada berupa kebaikan, kesenangan, keburukan ataupun kesusahan. Semua ini harus kita imani dengan teguh dan sabar serta dengannya kita mengharapkan hikmah, kebaikan dan ganjaran dari Allah Taala jua. Dalam masa yang sama, kita juga tidak menafikan usaha yang diiringi tawakal dan dilaksanakan mengikut kemampuan dan pengetahuan kita yang ada, selagi mana ia dibenarkan di dalam syariat Islam.

Tidak dapat dinafikan juga, ujian pandemik Covid-19 ini adalah amat berat, dan ianya dirasakan oleh segenap lapisan masyarakat sama ada kaya, miskin, muda atau tua. Maka di dalam ujian ini, siapa yang kembali kepada Allah jua maka merekalah sebaik-baik hamba yang beriman. Allah Subhanahu wa Taala berfirman dalam Surah An-Nahl ayat 53:

وَمَا بِكُمْ مِنْ نِعْمَةٍ فَمِنَ اللَّهِ ۖ ثُمَّ إِذَا مَسَّكُمُ الضُّرُّ فَإِلَيْهِ تَجَاوُونَ

Tafsirnya: *"Dan segala ni'mat yang ada pada kamu, ia adalah daripada Allah, kemudian apabila kamu ditimpa kemudharatan maka kepadaNya lah kamu meminta pertolongan."*

Rasulullah ﷺ juga bersabda, yang bermaksud: *"...Sekiranya engkau ditimpa sesuatu musibah, maka jangan engkau berkata: 'Sekiranya (kalau) aku lakukan begini maka sudah pasti lain yang berlaku.' Tetapi katakanlah: 'Itu merupakan takdir Allah dan Dia melakukan apa yang dikehendakiNya, sesungguhnya 'kalau' akan membukakan pintu amalan syaitan."* (Hadis riwayat Muslim)

Rasulullah ﷺ juga bersabda, yang bermaksud: *"Tidak ada sesuatu yang menimpa seseorang Islam sama ada kepenatan, kesakitan, kesusahan memikirkan perkara yang akan datang, keduakaan, sesuatu yang menyakiti, atau kesusahan mengingatkan apa yang telah berlaku - sehinggakan tikaman duri yang mencucuknya - melainkan Allah hapuskan dengan sebabnya, sebahagian dari dosa-dosanya."* (Hadis Riwayat Bukhari)

Dengan itu, mudah-mudahan Allah Ta'ala akan terus menerus menganugerahkan kepada kita semua keampunan, kesihatan, ke'afiatan, rezeki yang halal dan banyak, umur yang penuh keberkatan dan keselamatan di dunia dan akhirat. Ameen ya Rabbal 'Alamin.

والله ولي التوفيق